

Monday, February 2, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



GINGER PURCHASE

Vawiin atangin Mizoram hmun hrang hrangah sawhthing lei tan tum a ni.

Sawhthing lei tan tur hian district hrang hranga a buaipuitu District Agriculture Marketing Committee (DAMC) te ruahmanna-in Primary Collection Centre (PCC) leh Secondary Collection Centre (SCC) kaltlangin inbuatsaih fel tawh a ni a. SCC 65 ten rualkhai taka a man (a rate) an kalpui theih dan tur ruahmanna siam a ni tawh bakah SSC leh DAMC te hnenah an chet velna sum mamawh zualpui pek an ni ang a. Buffer stock a awm tawh lo vang a, Sawhthing Society member-te ta chauh lei a ni ang. Mizoram Agricultural Marketing Board (MAMB) ruahman dan chuan sawhthing hi vawiin February ni 2 atanga lei tan a ni dawn a. Hmunphiah hi February leh March 2026 chhunga lei a ni ang a, Aieng leh Mizo Hmarcha hi February atanga April thla chhung lei a ni ang a, Buhhum hi nikum November-ah khan lei tan tawhin January thla thleng khan lei a nih thu an sawi.

MAMB atanga thu dawn danin nikum chhung December thla bul thleng khan sawhthing kg nuai 338, sing 3, sang 5 leh 182 lei a ni a, minimum support price pek chhuah zawng zawng chu cheng vaibelchhe 137, nuai 72, sang 4 leh 477 a ni.

Puan tawh angin thla hlui January ni 13 khan Chief Minister Pu Lalduhoma'n Sairang Horticulture Centre-a Mizoram Agricultural Marketing Board-in Bana kaih (Handholding) Scheme hnuaia a din, Ginger Processing Unit chu a hawng a. He hunah hian Chief Minister chuan nikum lama sawhthing leina a thil dik tawh lo inrawlh ang chi kha a awm an rem tih dawn tawh loh thu a sawi a. Loneitute pawhin mahni thu a lo cho mai lovin collection centre-te lo ngaichang zel turin a chah a. Mumal taka kal tum tura a chah rualin sawhthing lei lai chuan a lei leh hralh lama sorkarin mawhphurhna a pek zawng zawngten ngaih pawimawh berah nei turin a hriattir a ni.



RED FEST

Rimawi hmanga hmarchhak bial thalaite hnena HIV/AIDS darh zel tur laka invenna leh inzirtira, Red Fest chu Zirtawpni khian LPS Arena, Falkland Aizawlah neih a ni dawn.

Vawiina Mizoram State AIDS Control Society (MSACS) hotute'n Aizawl Press Club a chanchinbumite an kawmna-ah he thu hi sawiin, National AIDS Control Organization (NACO) leh Mizoram State AIDS Control Society bultumin tun kar Zirtawpni khian North East Multi-Media Campaign (Red Fest) chu Mizoramin a thleng dawn a. He hunah hian hmar chhak State pariat -Arunachal, Assam, Meghalaya, Manipur, Mizoram, Nagaland, Sikkim leh Tripura state atanga zaimi kalkhawm ten rimawi hmangin mipui an awi dawn a, hemi ni hian MSACS buatsaihin Mizo zaithiam hrang hrangte'n HIV/Aids do na lam hla an sak chu tlangzarh a ni dawn bawh a ni. Red Fest ah hian hmar chhak State hang hrang hnam ziarang pho chhuah a ni dawn a, state tin atanga State AIDS Control Society te'n HIV chungchang zirtirna hmanraw hrang hrang stall an buatsaih dawn bawh a ni.

Byte: MSACS project director Jane.R.Ralte

Multi-Media Campaign (Red Fest) hi kum dangah pawh hmarchhak state hrang hrangah huaihawt tawh thin a ni a. Kumin hian Mizoram in a thleng dawn a, Health & Family Welfare Dept. Minister Pi Lalrinpuii chu khuallian a ni dawn a, State tin atangin Project Director leh State AIDS Control Society Officials te bakah NACO atangin Additional Secretary & Director General leh High Officials ten an hmanpui dawn a ni.



HIV/AIDS

Nikum April leh December thla inkar chhung khan Mizoramah HIV vei thar mi 3,354 hmuh chhuah a ni.

Mizoram State AIDS Control Society hotute hnen atanga Akashvani Aizawl News-in thu a dawn danin mi nawlpui 3,171 (mipa 2,191 leh hmeichhia 980) an ni a. Nu nau pai lai HIV hri kai 183 an awm bawk. Nikum chhunga HIV hri kai thar zinga za zela 65 point 32 hi mipa an ni a, hmeichhia hi naupai lai tiamin za zela 34 point 68 a ni. Hemi hun chhunga HIV kai zinga za zela 70 point 61 hi hmeichhiat/mipat hman vanga kai an ni a, za zela 26 point 87 chu syringe leh hriau inhman tawm atanga kai niin za zel a 1 point 77 chu naute in a nu hnen atanga a kai an ni.

HIV hri kai zinga tam ber hi kum 15 leh kum 49 inkara upa an ni a, za zela 88 point 71 lai an ni a. He mi kum zingah hian kum 25 leh 34 inkar tam berin mi 1,193 an ni a, kum 35 leh 49 inkarin dawtin mi 976 an ni a, kum 15 leh 24 inkar mi 644 an ni. Kum 14 leh a hnuai lam HIV kai mi 59 an awm a, kum 50 chung lam kai thar mi 299 an awm bawk. Kum 1999 October thla a Mizorama HIV kai hmuhchhuah a nih atanga nikum December thla inkar chhunga HIV kai hmuhchhuah tawh zawng zawng chu mi 33,878 an tling tawh a ni.

Nikum December thla a HIV hrik kai la dam, HIV damdawi Antiretroviral therapy (ART) hmanga inenkawl mek chu mi 18,224 an ni.

